

2018-miit ukiuni marluogallartuni misiliilluni unnukkut ammasartussamik (nal. 16-24) nuna tamakkerlugu call-centerimik, Nuna tamakkerlugu Ilitsersuisarfik (NTI-p) ataani pilersitsinissamat Naalakkersuisut peqquneqarnissaannik Inatsisartut aalajangiiffigisassaattut siunnersuut. Call-Centeri sukkasuumik kinaassutsimillu isertuussilluni ilinniartunut, ilinniarnikkut, aningaasatigut inuttulluunniit ajornartor-siuteqartunut ikorfartuissaaq siunnersuisarlunilu. Call-centerip aamma taamatut siunnersuisarsinnaas-saaq ilinniartut ilaqutaannut.

(Inatsisartuni ilaasortaq Nivi Olsen, Demokraatit)

Siumumiit Nivi Olsen, Demokraatit aalajangiiffigisassatut siunnersuutaanut qujavugut. Imatullu oqaaseqarfigissavarput.

Siunnersuutip imarisaa tamakkiisumik paasilluinnarparput. Nunatsinni ilinniartut saaffissaqarsinnaanerit maannamut ingerlanneqartoq assut qujamasunnarpoq, naak unggornaraluartoq piffissani killeqartuni tamanna ingerlanneqartoq taamaattoq paasinarpoq sulisussanik aningaasatigullu kingunissai tassuunakkut suli unammillernartuusut.

Ilinniartut amerlanerusut ilinniakkaminnik naammassinnittarnissai soorunami Siumumiit kissaatitta annersaasa ilaanniippoq. Tamatumalu annikinnerpaaffianiilernissaa Naalakkersuisooqatigiinnerup iluani anguniakkani pingaartinneqarluni ilaavoq.

Qujassutissaavoq ilinniartitaanermi periarfissarititaasut suli pitsanngorsarneqartuarmata. Taamaattumik oqartoqarsinnaangilaq nikittoqarsimanngitsoq. Sutigut tamatigut suliniutit pitsanngorsartuarneqarsinnaapput, nunami ineriartortumi tamanna avaqqunneqarsinnaangilaq. Uanili siunnersuummi anguniagaq maannangaaq angunissaa suli unammilligassaavoq. Sulisussatigut amigaatit, aningaasatigullu pisariaqartitat tamakkiisuunnginneri. Taavalu ullumikkut ilinniartunut saaffiginnittunit utaqqisut amerleriarsinnaanerisa kinguneranik tulleriarinerit.

Siunnersuutip tunngaviatigut paasilluarsinnaagaluarparput taamaattoq Naalakkersuisut akissutaanni paasinarpoq maanna suliniutit pitsanngorsarneqarnerit ingerlanneqartoq, taavalu unammilligassat allat suli ingerlammata siunnersuut taamak isikkoqartillugu Siumumiit itigartipparput.

Laura Táunâjik, Siumut